

PWYLLGOR ARCHWILIO A LLYWODRAETHU

Cofnodion y cyfarfod a gynhaliwyd ar 27 Gorffennaf 2015

YN BRESENNOL:	Y Cynghorydd R. Llewelyn Jones (Cadeirydd) Y Cynghorydd John Griffith (Is-Gadeirydd) Y Cynghorwyr Jim Evans, Alun Mummery, Richard Owain Jones, Peter Rogers, Dafydd Rhys Thomas Aelodau Lleyg: Mr Richard Barker, Mrs Sharon Warnes
WRTH LAW:	Y Prif Weithredwr Pennaeth Adnoddau a Swyddog Adran 151 Dros Dro Rheolwr Gwasanaethau Cyfrifeg a Dirprwy Swyddog Adran 151 Rheolwr Archwilio Dros Dro (RS) Rheolwr Risg ac Yswiriant ar (ar gyfer eitemau 8 a 10) Rheolwr Gwasanaeth Cyllid (CK) (ar gyfer eitem 3) Uwch Gyfrifydd (Cynllunio Strategol a Thrawsnewid) (BD) (ar gyfer eitem 3) Swyddog Pwyllgor (ATH)
YMDDIHEURIADAU:	Dim
HEFYD YN BRESENNOL:	Mr Martin George (PwC), Mr Mike Halstead (Pennaeth Archwilio a Chaffael) a Sioned Parry (Rheolwr Archwilio - Perfformiad) (Cyngor Bwrdeistref Sirol Conwy)

1. DATGAN DIDDORDEB

Ni chafwyd unrhyw ddatganiadau o ddiddordeb.

2. COFNODION CYFARFOD 23 MEHEFIN 2015

Cyflwynwyd cofnodion cyfarfod blaenorol y Pwyllgor Archwilio a Llywodraethu a gynhaliwyd ar 23 Mehefin 2015 a chadarnhawyd eu bod yn gywir, yn amodol ar nodi mewn perthynas ag eitem 1 fod Mrs Sharon Warnes wedi cael ei phenodi i'r Bwrdd Cronfa Bensiwn Gwynedd newydd yn hytrach na Phwyllgor y Gronfa Bensiwn.

Yn codi o'r cofnodion –

- Cadarnhaodd y Pennaeth Adnoddau a'r Swyddog Adran 151 Dros Dro yn unol â'r hyn yr oedd wedi ei addo yn y cyfarfod blaenorol, ei fod wedi codi'r pryderon a godwyd gan Aelodau Lleyg y Pwyllgor ynghylch diffyg darpariaeth iddynt hwy fod yn rhan o'r broses o ethol Cadeirydd ac Is-Gadeirydd ar gyfer y Pwyllgor Archwilio a Llywodraethu gyda'r Uwch Dîm Arweinyddiaeth. O ganlyniad, byddai'r Prif Weithredwr yn trafod y mater gydag Arweinyddion y Grwpiau Gwleidyddol, ac wedi hynny, ac ar y cyd â'r Swyddog Monitro byddai'n cyflwyno adroddiad i'r cyfarfod nesaf ar addasu'r broses er mwyn rhoi sylw i'r pryderon hynny ar gyfer y dyfodol.

Derbyniodd a nododd y Pwyllgor y wybodaeth.

- Mewn ymateb i gais am ddiweddariad ar p'un a fu unrhyw gyfathrebu pellach gan Heddlu Gogledd Cymru ynglŷn â chynnydd gydag ymchwilio i ymgais o dwyll yn erbyn y Cyngor – achos a amlygwyd yn flaenorol gan Archwilio Mewnol ac a godwyd mewn gohebiaeth gyda Heddlu Gogledd Cymru fel yr adroddwyd i gyfarfod y Pwyllgor ym mis Mehefin, dywedodd y Pennaeth

Adnoddau a'r Swyddog Adran 151 Dros Dro ei fod wedi ceisio eglurhad pellach gan Heddlu Gogledd Cymru ar sut oeddent yn gweithredu ar y mater hwn, a gallai adrodd fod yr Heddlu wedi cadarnhau eu bod nawr yn gweithio gyda lluoedd eraill (nid oedd y twyll wedi'i gyfyngu i'r Awdurdod hwn yn unig) a byddant yn dod yn ôl gydag ymateb manylach. Rydym dal yn disgwyl am yr ymateb hwn.

Nododd y Pwyllgor y sefyllfa heb unrhyw weithredu pellach.

3. ADOLYGIAD BLYNYDDOL RHEOLI TRYSORLYS 2014/15

Cyflwynwyd i'r Pwyllgor i'w ystyried ac i graffu arno – Adroddiad y Pennaeth Adnoddau a'r Swyddog Adran 151 Dros Dro yn ymgorffori'r Adolygiad Blynyddol Rheoli Trysorlys ar gyfer 2014/15. Roedd yr Adroddiad yn nodi'r sefyllfa alldro yng nghyswllt gweithgareddau trysorlys yn ystod y flwyddyn ac yn amlygu cydymffurfiaeth â pholisïau'r Cyngor fel y cymeradwywyd yn flaenorol gan yr Aelodau.

Adroddodd yr Uwch Gyfrifydd (Cynllunio Strategol a Thrawsnewid) y cawsai gwariant cyfalaf yn ystod y flwyddyn ei ariannu drwy sawl ffynhonnell; yn wyneb cyfraddau llog y farchnad a risgiau credyd y gwrthbartion ar hyn o bryd ac yn y dyfodol (rhoddwyd statws credyd y gwrthbartion yn Atodiad 2), penderfynwyd parhau i fenthycan fewnol yn y tymor byr er mwyn lleihau'r risgiau a'r costau. Mae'r Cyngor wedi gweithredu'r strategaeth hon ym mhob un o'r pedair blynedd diwethaf hyd yma, ac o ganlyniad i barhau â'r dull hwn, gostyngodd y bwlch rhwng angen benthycan sylfaenol y Cyngor (CFR) a benthycan allanol i £19m yn ystod 2014/15. Dywedodd y swyddog fod CFR sy'n lleihau yn erbyn benthycan allanol wedi bod yn thema gyffredin yn y blynyddoedd diweddar a chadarnhaodd fod y Cyngor wedi cydymffurfio â holl derfynau a dangosyddion darbodus y trysorlys a'i fod yn gweithredu yn unol â'r Strategaeth Rheoli Trysorlys a gymeradwywyd. Adroddwyd yn flaenorol bod yr Awdurdod yn paratoi i ddod allan o'r system cymhorthdal CRT ar 2 Ebrill 2015, ac ar adeg adrodd ynghylch Chwarter 3 roedd yn hysbys y byddai'r arian i brynu allan yn cael ei gyllido trwy'r Bwrdd Benthyciadau Gwaith Cyhoeddus a bod swm y setliad a'r gyfradd llog ar y benthyciad eto i'w cadarnhau. Mae'r pryniant yn awr wedi'i gwblhau ac mae'r CRT yn ariannu ei hun erbyn hyn.

Rhoddodd y Pwyllgor ystyriaeth i'r adroddiad a gwnaeth y pwyntiau a ganlyn -

- Ceisiodd y Pwyllgor eglurhad, yn wyneb yr hinsawdd bresennol o fenthycan rhad, ynghylch a ddylai'r Cyngor fod yn edrych ar wneud y mwyaf o gyfleoedd i fenthycan. Dywedodd yr Uwch Gyfrifydd (Cynllunio Strategol a Thrawsnewid) pe bai'r Awdurdod yn allanoli ei holl fenthycan byddai'n golygu lleoli'r arian gyda gwrthbartion yn y banciau a fyddai'n peri risg i'r Cyngor oherwydd y potensial i'r gwrthbartion ddiffyg dalu. Yn ogystal, yn y tymor byr byddai ddefnyddio ei arian ei hun yn galluogi'r Awdurdod i leihau costau benthycan. Nod y dull hwn yw'r rhoi'r gorau i enillion tymor byr a allai fod yn andwyol i'r Awdurdod yn y tymor hir. Mae'n bwysig asesu'r symudiad a ragwelir yn y marchnadoedd a'r amodau ar gyfer buddsoddi yn rheolaidd er mwyn sicrhau eu bod yn addas. Cadarnhaodd y Swyddog eu bod yn cadw llygaid barhaus ar y sefyllfa.
- Ceisiodd y Pwyllgor sefydlu, yn wyneb y cyfraddau llog isaf ers blynyddoedd, a fyddai wedi bod yn fwy manteisiol i'r Awdurdod fabwysiadu strategaeth o ddefnyddio ei gapasiti benthycan i gynllunio buddsoddi yn ei bortffolio eiddo (nodwyd y portffolio mân-ddaliadau fel enghraifft), ac awgrymwyd fod y portffolio wedi cael ei adael i ddirywio i'r fath raddau fel bod angen gwaith adfer ar lawer mwy o gost erbyn hyn. Er yn cydnabod y pwynt hwn, dywedodd y Pennaeth Adnoddau a Swyddog Adran 151 Dros Dro fod rhaid cadw mewn cof fod benthycan arian yn dod â chostau referniw ychwanegol hefyd. Os gellid dangos bod gwahaniaeth clir rhwng y swm a delir ar fenthyciadau a'r enillion a gafwyd ar fuddsoddiad dros gyfnod o nifer o flynyddoedd, efallai y byddai wedi bod yn fanteisiol i'r Awdurdod fod wedi defnyddio dull o'r fath, ond ni ellir ond dod i'r casgliad hwnnw gyda'r fantais o edrych yn ôl. Fodd bynnag, mae yna opsiynau eraill y gellid bod wedi eu hystyried.

Penderfynwyd –

- **Nodi y bydd y ffigurau yn yr adroddiad adolygu yn aros yn rhai dros dro hyd nes y caiff yr archwiliad ar Ddatganiad Cyfrifon 2014/15 ei gwblhau a'i arwyddo ac y bydd unrhyw addasiadau sylweddol o ganlyniad i'r ffigurau sydd wedi'u cynnwys yn yr adroddiad yn cael eu hadrodd fel bo'n briodol.**

- **Nodi'r dangosyddion darbodus a thrysorlys dros dro gwirioneddol ar gyfer 2014/15 yn yr adroddiad.**
- **Nodi a derbyn adroddiad yr Adolygiad Rheoli Trysorlys ar gyfer 2014/15 fel y'i cyflwynwyd a'i anfon ymlaen at y Pwyllgor Gwaith heb sylwadau ychwanegol.**

4. ARCHWILIO ALLANOL _ ADRODDIAD CYNNYDD AR YR ARCHWILIAD ARIANNOL

Adroddodd Mr Martin George, Rheolwr Archwilio PwC, fod yr archwiliad ffurfiol ar ddatganiadau ariannol yr Awdurdod wedi dechrau'n syth ar ôl cyfarfod y Pwyllgor ym mis Mehefin lle cyflwynwyd y Datganiad o Gyfrifon drafft ar gyfer 2014/15. Mae'r archwilwyr yn derbyn cymorth gan y tîm Gwasanaeth Cyllid a bydd y canfyddiadau ffurfiol o'r archwiliad yn cael eu cyflwyno i gyfarfod y Pwyllgor hwn ym mis Medi cyn argymhell eu bod yn cael eu cymeradwyo cyn y dyddiad cau statudol sef 30 Medi.

Penderfynwyd nodi'r sefyllfa heb sylwadau.

DIM GWEITHREDU PELLACH YN DILYN.

5. ADRODDIAD CYNNYDD ARCHWILIO MEWNOL

Cyflwynwyd i'r Pwyllgor ei ystyried – adroddiad y Rheolwr Archwilio Mewnol Dros Dro yn amlinellu'r cynnydd wrth gyflawni gwaith archwilio'r Adain Archwilio Fewnol a gynlluniwyd ar gyfer chwarter cyntaf y flwyddyn ariannol 2015/16.

Adroddodd y Rheolwr Archwilio Dros Dro fel a ganlyn –

- Mae'r tabl ym mharagraff 2.2 yr adroddiad yn dangos y cynnydd a wnaed yn erbyn y Cynllun Archwilio Gweithredol ar gyfer 2015/16 sy'n cydymffurfio'n fras â'r disgwiliadau am y cyfnod hwn. Cawsai'r cynnydd ei rwystro i raddau gan lefel uwch na'r disgwyl o salwch yn y tîm Archwilio ac oherwydd bod dwy swydd wag yn y tîm.
- Mae'r tabl ym mharagraff 3.1 yr adroddiad yn cofnodi'r adroddiadau terfynol a gyhoeddwyd ers 1 Ebrill 2015; mae paragraff 3.2 yn rhoi'r graddau sicrwydd CAG a ddefnyddiwyd yn ystod 2014/15 a beth yw eu harwyddocâd.
- Cyflwynwyd diffiniadau lefel sicrwydd newydd ar gyfer 2015/16 sy'n glir ac yn fwy pendant ac yn rhoi blaenoriaeth i'r argymhellion a wnaed. Amlinellir y rhain ym mharagraff 3.3.
- Ar yr un pryd, ac am y tro cyntaf, cyflwynwyd diffiniadau o'r lefelau blaenoriaeth a ryddhawyd ar gyfer argymhellion archwilio mewnol gyda'r bwriad o wella cysondeb o fewn y tîm archwilio a gwella dealltwriaeth ac eglurder i'r sawl sy'n derbyn yr adroddiad. Caiff y rhain eu hegluro ym mharagraff 3.4 yr adroddiad.
- Er mai'r arfer fu cynnwys gwybodaeth ynghylch statws gweithredu argymhellion blaenoriaeth lefel uchel a chanolig yn yr adroddiadau cynnydd archwilio mewnol bob chwarter, ni ddarparwyd data o'r fath ar gyfer y chwarter hwn. Y rheswm am hynny yw, ar ôl edrych ar y sail ar gyfer dwyn y wybodaeth honno ynghyd, nid oedd y Rheolwr Archwilio Mewnol Dros Dro yn hyderus y gellid cynhyrchu data sy'n rhoi adlewyrchiad dibynadwy o'r sefyllfa gyfredol ac yn rhoi'r sicrwydd angenrheidiol. Mae angen gwneud gwaith i wella'r broses o gasglu data ar argymhellion y cytunwyd arnynt a sut caiff cynnydd wrth weithredu ei fonitro fel bod modd adrodd yn gywir i'r UDA a'r Pwyllgor hwn yn y dyfodol.

Rhoddodd y Pwyllgor ystyriaeth i'r wybodaeth a gyflwynwyd a cheisiodd eglurhad pellach ar y materion ynghylch cywirdeb a dibynadwyedd y bâsdata ar gyfer cynhyrchu gwybodaeth am statws gweithredu'r argymhellion archwilio mewnol a ph'un a oedd hyn yn fater Rheolaethol neu'n fater i Archwilio Mewnol. Dywedodd y Rheolwr Archwilio Mawrol Dros Dro fod yna gwestiynau y mae angen i Archwilio Mewnol roi sylw iddynt ynghlân â chasglu data ac yn ei farn ef, roedd y bâsdata a ddefnyddiwyd i gael y wybodaeth yn ddiffygiol ac nid yw'n rhoi sicrwydd digonol. Fodd bynnag, cyfrifoldeb y Rheolwyr yw gweithredu'r argymhellion a chyfrifoldeb Archwilio Mewnol yw adrodd ar statws y gweithredu fel gall y Pwyllgor dderbyn sicrwydd neu beidio o ymateb y Rheolwyr i'r argymhellion archwilio mewnol mewn perthynas â rheolaethau mewnol a chydymffurfiaeth.

Penderfynwyd derbyn yr adroddiad cynnydd a nodi ei gynnwys.

DIM GWEITHREDU PELLACH YN DILYN

6. CYNLLUN ARCHWILIO MEWNOL STRATEGOL 2015/16 I 2017/18

Cyflwynwyd i'r Pwyllgor ei ystyried a'i gymeradwyo – adroddiad y Rheolwr Archwilio Mewnol Dros Dro yn ymgorffori Cynllun Archwilio Mewnol Strategol diwygiedig ar gyfer 2015/16 i 2017/18.

Adroddodd y Rheolwr Archwilio Mewnol Dros Dro fod y Cynllun Archwilio Gweithredol oedd yn bodoli ar gyfer 2015/16 wedi cael ei gyflwyno i'r Pwyllgor Archwilio a'i gymeradwyo ganddo yn ei gyfarfod ar 23 Chwefror 2015. Mae ymholiadau ers hynny wedi adnabod yr angen i ailymchwilio i'r meysydd a gynlluniwyd y byddai archwilio mewnol yn edrych arnynt ac felly cyflwynir i'r Pwyllgor gynllun archwilio strategol arfaethedig wedi ei addasu yn Atodiad A. Dywedodd y Swyddog y gellid crynhoi'r prif addasiadau a'r rhesymau am y newid fel a ganlyn -

- O gymharu â'r cynllun presennol, mae'r cynllun diwygiedig yn fwy cytbwys, yn lledaenu'r gwaith archwilio yn fwy eang ac yn para tair blynedd yn hytrach nag un. Mae'r cynllun yn rhoi sylw i'r holl feysydd yr ystyrir eu bod yn berthnasol i'w hadolygu gan archwilio mewnol o fewn y Cylch tair blynedd.
- Roedd yr adnoddau archwilio yn y cynllun gwreiddiol yn cael eu neilltuo'n bennaf ar gyfer systemau ariannol allweddol ac roedd yn seiliedig ar swm penodol o adnoddau, nid oedd lle ynddo i fynd ar ôl meysydd gweithgaredd eraill oedd yr un mor bwysig. Mae'r cynllun diwygiedig yn gobeithio aiddosbarthu'r adnodd archwilio yn fwy cytbwys er mwyn gallu ymchwilio i nifer o feysydd nad ydynt wedi derbyn adolygiad archwilio blynyddoedd diweddar.
- Mae elfen o hyblygrwydd yn y cynllun diwygiedig ac mae'n darparu adnodd wrth gefn o thua 10%.
- Mae gwaith archwilio ysgolion wedi ei dargedu yn yr ysgolion mwy yn y cynllun diwygiedig yn hytrach na'i fod ar sail rota fel oedd yr arfer yn y gorffennol. Mae'r cynllun hefyd yn galluogi adolygiadau thematig mewn detholiad o ysgolion llai.
- Mae'r cynllun wedi adnabod bwlch yn yr adnoddau archwilio mewnol ac wedi dangos fod y gwasanaeth angen un person llawn amser ychwanegol i gyflawni'r gwaith sydd wedi'i gynllunio. Ar hyn o bryd mae dwy swydd wag ar lefel is yn y gwasanaeth, ac ar ôl ystyried y ffordd orau o fynd i'r afael â'r diffyg o ran cyflawni'r cynllun yn effeithiol, y farn yw y dylid ildio'r ddwy swydd is er mwyn cael un swydd uwch.

Rhoddodd y Pwyllgor ystyriaeth i'r cynllun archwilio mewnol strategol diwygiedig a gwnaeth y sylwadau a ganlyn arno –

- Roedd y Pwyllgor yn cydnabod fod y cynllun yn gynhwysfawr o ran y meysydd yr oedd yn eu hymgorffori ac roedd yn croesawu'r cylch tair blynedd newydd. Credai hefyd fod y cynllun yn bodloni'r cais a wnaed yn y cyfarfod diwethaf am ganllaw ymarferol i'r meysydd a'r themâu y dylai fo yn eu hadolygu'n barhaus.
- Nododd y Pwyllgor fod y swyddogaeth Archwilio mewnol yn rhan allweddol o fframwaith llywodraethu'r Awdurdod o ran monitro perfformiad rheolaethau mewnol y Cyngor a rhoi hyder a sicrwydd ynghylch sut mae'r Cyngor yn rhedeg ei fusnes, yn rheoli ei risgiau ac yn cydymffurfio â rheoliadau a pholisiau mewnol. Pwysleisiodd fod angen i archwilio mewnol weithio'n agos gyda Rheolwyr i sicrhau fod y system o reolaethau mewnol yn gweithio'n effeithiol. Dywedodd y Rheolwr Archwilio mewnol fod sawl maes o weithgaredd y Cyngor y mae angen edrych arnynt sydd heb dderbyn ystyriaeth am flynyddoedd lawer, a bod y cynllun archwilio diwygiedig yn adnabod y gofyn hwn ac yn rhoi sylw pendant iddo. Fodd bynnag, mae'n bwysig nad yw'r cynllun archwilio yn cael ei weld fel dogfen ddu a gwyn – mae'n annochel y bydd materion yn codi yn ystod y flwyddyn ac er yn y gorffennol fod prosiectau a gynlluniwyd wedi ildio i'r materion hynny, mae adnodd wrth gefn o 10% ar gyfer y cynllun archwilio diwygiedig sy'n golygu na fydd angen aberthu ymrwymadau a gynlluniwyd er mwyn gallu ymateb i faterion newydd. Mae gofyn cael elfen o hyblygrwydd yn y Tim Archwilio er mwyn bod yn effeithiol.
- Mynegodd y Pwyllgor beth pryder ynghylch y bwriad o aberthu dwy swydd is o blaid un swydd uwch yng nghyswllt adeiladu capasiti o fewn Archwilio Mewnol ar gyfer y dyfodol ac yng nghyd-destun y bwriad a'r addewid i ddatblygu a meithrin ein staff ein hunain wrth ddatblygu capasiti a sgiliau o fewn yr Awdurdod yn gyffredinol. Nododd y Pwyllgor efallai y byddai aberthu'r elfen ddatblygu am gymhelliant tymor byr yn wrthgynhyrchiol yn y tymor hir.

Dyweddod y Rheolwr Archwilio Mewnol Dros Dro fod y Gwasanaeth Archwilio Mewnol angen person medrus a all ddechrau'r gwaith yn syth; gan ei fod yn dîm bychan a chanddo amcanion i'w cyflawni o fewn amserlen benodol, mae'r gwasanaeth angen lefel o arbenigedd i fodloni'r cyfrifoldebau hynny ac felly ni all fforddio defnyddio hyfforddai ar yr adeg hon ond nid yw hynny o reidrwydd yn adlewyrchu sut mae'r Awdurdod yn bwriadu gweithredu'n gorfforaethol. Rhoddodd y Pennaeth Adnoddau a'r Swyddog Adran 151 Dros Dro wybod i'r Pwyllgor y bydd yr amser sydd ar gael i hyfforddai'r flwyddyn nesaf yn gyfyngedig gan fod y Cyngor wedi cyflogi Hyfforddai Cyllid Corfforaethol; Bydd y rhaglen hyfforddi arfaethedig ar gyfer yr unigolyn hwnnw yn cynnwys treulio cyfnod o amser yn Archwilio Mewnol a fydd felly yn darparu rhyw elfen o adnodd ychwanegol yn y gwasanaeth. Mae'r pwynt a wnaed gan y Rheolwr Archwilio Mewnol Dros Dro ynglŷn â'r gwerth i'r Cyngor o gael un unigolyn medrus yn hytrach na dau unigolyn ar lefel is yn bwynt dilys ac yn un y dylai'r Pwyllgor ei gadw mewn cof. Pe bai problem ynghylch adnoddau yn codi yn y misoedd canlynol bydd cyfle i adnabod materion o'r fath mewn adroddiadau cynnydd Archwilio Mewnol; fodd bynnag, byddai'n gynamserol ceisio gwneud unrhyw benderfyniad ynghyn â staff yn y cyfarfod hwn. Mae angen gwneud penderfyniad o'r fath yn ofalus ac ar y sail adroddiad sy'n egluro'r holl ffeithiau ynghylch beth sydd ei angen i sicrhau bod adnoddau digonol yn y Gwasanaeth Archwilio Mewnol a bod ganddo'r cymysgedd cywir o staff a chymwyseddau i allu cyflawni ei gyfrifoldebau yn effeithiol.

- Nododd y Pwyllgor fod rhai meysydd a raglenwyd i'w hadolygu yn y cynllun archwilio diwygiedig heb gael sylw am nifer o flynyddoedd ac felly nid oedd barn archwilio na lefel o sicrwydd ar eu cyfer. Soniwyd am ddiogelu fel enghraifft o faes hanfodol a chyfredol yr oedd y Pwyllgor yn ystyried y dylid ei archwilio'n rheolaidd. Cadarnhaodd y Rheolwr Archwilio Mewnol Dros Dro fod diogelu yn faes gweithgaredd a archwilir yn flynyddol dan y cynllun diwygiedig, gan sicrhau ei fod yn cael ei roi ar sylfaen gadarn o hyn ymlaen. O ran yr archwiliad diwethaf a wnaed ar gyfer pob maes yn y cynllun dywedodd y Swyddog nad oedd wedi edrych yn ôl yn bellach na 2012/13 oherwydd mai ychydig o werth a pherthnasedd fyddai gan unrhyw adolygiad oedd yn dyddio'n ôl ymhellach na hynny.
- Roedd y Pwyllgor hefyd wedi amygu Parhad Busnes fel maes a oedd yn arbennig o berthnasol o gofio cyd-destun diwydiannol yr Ynys ac roedd yn bryderus bod yr adolygiad archwilio diwethaf wedi dyfarnu barn archwilio coch ar ei gyfer. Gofynnodd y Pwyllgor pa bryd y byddai adroddiad ar y maes hwn ar gael iddo. Dywedodd y Pennaeth Adnoddau a'r Swyddog Adran 151 Dros Dro y dylai ffocws y Pwyllgor fod ar ymateb Rheolwyr i unrhyw argymhellion a wneir gan y Gwasanaeth Archwilio Mewnol ynghylch gwella trefniadau llywodraethiant Parhad Busnes unwaith y bydd yr adroddiad wedi ei gyhoeddi yn hytrach na'r adroddiad ei hun. Yr hyn a ddylai achosi pryder i'r Pwyllgor yw sefyllfa lle nad yw rheolwyr yn gweithredu ar adroddiad neu fel arall ni fyddai modd delio â'r holl wybodaeth y byddai'n ei derbyn pe bai'n ceisio edrych ar bob adroddiad unigol. Bydd y Gwasanaeth Archwilio Mewnol yn parhau i gynhyrchu adroddiadau cynnydd chwarterol sy'n dangos pa faterion sy'n weddill i roi sylw iddynt a bydd yn parhau i adrodd ar y materion hynny hyd nes y byddant wedi cael sylw priodol a'u datrys. Mae angen i'r Pwyllgor gael y wybodaeth ddiweddaraf ar ymateb y rheolwyr i argymhellion a wneir gan y Gwasanaeth Archwilio Mewnol.
- Nododd y Pwyllgor fod sawl maes a nodwyd ar gyfer eu hadolygu yn y cynllun archwilio, yn arbennig y meysydd o natur gorfforaethol, yn rhai y mae'r Pwyllgor eisoes wedi eu nodi fel rhai sydd angen sylw ac mae'n awyddus i weld cynnydd yn cael ei wneud yn eu cylch. Gofynnodd y Pwyllgor am sicrwydd na fyddai'r cynllun archwilio'n cael ei newid heb ymgynghori gydag ef yn gyntaf, a phwysleisiodd nad oedd yn dymuno gweld y meysydd hyn yn cael eu colli wrth newid drosodd i'r trefniadau rheoli archwilio mewnol newydd. Cadarnhaodd y Pennaeth Adnoddau a'r Swyddog Adran 151 Dros Dro y byddir yn ymgynghori gyda'r Pwyllgor Archwilio a Llywodraethiant os bwriedir gwneud unrhyw newidiadau fel yr awdurdod sy'n penderfynu mewn perthynas â'r cynllun archwilio.
- Yn yn ogystal â derbyn gwybodaeth am gynnydd a chanlyniadau awgrymodd y Pwyllgor y byddai o fudd pe bai'n cael cofnod proses a fyddai'n dangos cerrig milltir allweddol yn y broses ar gyfer y materion hynny na fyddent efallai wedi disgyn ond a fyddai'n dal i gael sylw. Cynigiwyd y dylai'r Gwasanaeth Archwilio Mewnol ystyried ymgorffori darpariaeth o'r fath o fewn ei drefniadau adrodd.

Penderfynwyd cymeradwyo'r Cynllun Archwilio Strategol am y cyfnod 2015/16 i 2017/18 fel yn Atodiad A i'r adroddiad.

CAM GWEITHREDU'N CODI: Y Gwasanaeth Archwilio Mewnol i ymgorffori yn ei drefniadau adrodd ddarpariaeth ar gyfer dangos materion sy'n parhau i gael sylw.

7. GWASANAETH DIESEL ARFOROL

Cafodd y Pwyllgor wybodaeth ychwanegol gan y Rheolydd Gwasanaethau Cyfrifeg am y Gwasanaeth Diesel Arforol mewn perthynas ag incwm a gwariant a dileu dyledion fel y gofynnwyd yn y cyfarfod blaenorol.

Dyweddodd y Swyddog wrth y Pwyllgor ei bod wedi archwilio'r cofnodion ar gyfer y Gwasanaeth Diesel Arforol am y chwe blynedd blaenorol ac y gallai gadarnhau bod elfen diesel y gwasanaeth wedi parhau i fod yn broffidiol ym mhob un o'r blynyddoedd hynny. Yr elw lleiaf a gafwyd oedd £2,000 a hynny ym mlwyddyn ariannol 2011/12 a'r elw mwyaf oedd £66,000 a gynhyrchwyd ym mlwyddyn ariannol 2012/13. Nid oedd unrhyw ddyledion wedi eu dileu mewn perthynas â diesel yn ystod y ddwy flynedd yr edrychwyd arnynt, sef 2013/14 a 2014/15.

Mewn ymateb i geisiadau am eglurhad ar bwyntiau penodol dywedodd y Swyddog -

- Y byddai'n ceisio darganfod gan y Gwasanaeth a oes modd prynu diesel gydag arian parod ac os oes, pa bryd y gwnaed taliadau o'r fath.
- Bod tair anfoneb a oedd yn gwneud cyfanswm o £18k wedi cael eu rhoi o'r neilltu ar gyfer dileu'r dyledion o bosib.

Penderfynwyd nodi'r wybodaeth.

DIM CAM GWEITHREDU PELLACH YN CODI

8. HAWLIADAU YSWIRIANT

Cyflwynwyd i sylw'r Pwyllgor adroddiad y Rheolwr Risg ac Yswiriant mewn perthynas â hawliadau yswiriant yn erbyn yr Awdurdod yn ystod y blynyddoedd ariannol o 2010/11 i 2014/15. Roedd Atodiad A oedd ynghlwm yn cynnwys dadansoddiad fesul polisi ar gyfer pob un o'r blynyddoedd ariannol i'r Cyngor yn ei gyfanrwydd o nifer yr hawliadau a dalwyd, lle mae'r hawliad wedi ei setlo heb unrhyw gostau na thâl yn cael ei wneud, neu lle nad yw'r hawliad wedi'i setlo hyd yma. Darparwyd gwybodaeth hefyd am y swm a dalwyd mewn perthynas â'r hawliadau a gawsant eu setlo a'r symiau a gadwyd o'r neilltu ar gyfer yr hawliadau hynny nad ydynt wedi eu setlo eto.

Cyfeiriodd y Rheolwr Risg ac Yswiriant at batrymau hawliadau am y cyfnod yr adroddwyd arno ynghyd â'r heriau i'r dyfodol a'r hyn y gallai hynny olygu i'r Cyngor yn arbenig felly o ran amddiffyn hawliadau'n llwyddiannus. Cadarnhaodd y Swyddog nad oedd yr adroddiad yn amlygu unrhyw faterion eithriadol y dylai'r Pwyllgor fod yn bryderus yn eu cylch ar hyn o bryd.

Gofynnodd y Pwyllgor am eglurhad ar rai pwyntiau yn yr adroddiad a gwybodaeth ychwanegol hefyd am y galw ar y gronfa wrth gefn ar gyfer hawliadau yswiriant. Mewn ymateb i gadarnhad bod lefel y gronfa wedi aros yn sefydlog, awgrymodd y Pwyllgor, efallai y dylid ailystyried y gronfa wrth gefn o £2m ar gyfer yswiriant, yn arbennig felly yn yr hinsawdd gyfredol o doriadau mewn gwasanaethau a phan fo'r galw ar y gronfa yn parhau i fod yn sylweddol is na'r uchafswm hwnnw. Cadarnhaodd y Rheolydd Gwasanaethau Cyfrifeg fod y gronfa wrth gefn ar gyfer yswiriant wedi cael ei hadolygu ac o ganlyniad fe'i gostyngwyd i £1m.

Penderfynwyd derbyn yr adroddiad a nodi ei gynnwys.

DIM CAM GWEITHREDU PELLACH YN CODI

9. CAU ALLAN Y WASG A'R CYHOEDD

Dan Adran 100 (A)(4) Deddf Llywodraeth Leol 1972, gyrrwyd y wasg a'r cyhoedd allan o'r cyfarfod yn ystod y drafodaeth ar yr eitem a ganlyn, oherwydd y tebygrwydd y câi gwybodaeth ei rhyddhau a honno'n wybodaeth y gwna Atodlen 12A y Ddeddf eithriad ohoni fel y diffinnir y wybodaeth yn y Ddeddf ac yn y Prawf Budd y Cyhoedd sydd ynghlwm.

10. RHEOLI RISG

Cyflwynwyd i sylw'r Pwyllgor adroddiad y Rheolydd Risg ac Yswiriant yn ymgorffori'r Polisi Rheoli Risg a'r Meini Prawf Asesu Risg ynghyd â'r Gofrestr Risg Gorfforaethol gyfredol. Dywedodd y Rheolydd Risg ac Yswiriant wrth y Pwyllgor fod y Cyngor, yn dilyn adolygiad allanol o drefniadau rheoli risg ym mis Hydref 2014, wedi diweddarau'r ffurf ac wedi adolygu cynnwys ei Gofrestr Risg Gorfforaethol. Roedd y Gofrestr Risg Gorfforaethol ddiweddaedig i'w gweld yn Atodiad C i'r adroddiad. Nodwyd deg risg fawr fel yr amlinellwyd yn yr adroddiad. Yn ogystal, roedd pob gwasanaeth wedi cyflwyno Cofrestrau Risg Gwasanaeth fel rhan o'r broses Cynllunio Busnes. Y rhain oedd y cofrestrau risg cyntaf a gyflwynwyd gan ddefnyddio'r ffurf newydd a chydabyddir y bydd gwasanaethau angen amser i addasu a deall yn llawn y newidiadau a wnaed. Bydd gwasanaethau felly'n parhau i gael cymorth gan y Rheolydd Risg ac Yswiriant i ddatblygu eu cofrestrau Risg Gwasanaeth fel y bydd angen. O'r herwydd rhagwelir y bydd rhai risgiau gwasanaeth ychwanegol yn cael eu cynnwys ar y Gofrestr Risg Gorfforaethol neu'n cael eu tynnu oddi arni dros y 12 i 18 mis nesaf. Bydd risgiau gwasanaeth newydd a risgiau lle mae'r sgôr yn codi oherwydd newid mewn amgylchiadau yn cael eu monitro'n barhaus a'u huwch gyfeirio os oes angen.

Rhoddodd y Pwyllgor sylw i'r adroddiad a gofynnodd am eglurhad ynghylch sut y byddai'n cael ei ddiweddarau ynglŷn â gweithgareddau rheoli risg, yn arbennig felly mewn perthynas ag unrhyw newidiadau a all ddigwydd a'r rhesymau pam, fel bod modd iddo gael sicrwydd bod y risgiau allweddol yn cael eu rheoli'n briodol. Dywedodd y Rheolydd Risg ac Yswiriant mai'r bwriad yw adrodd i'r Pwyllgor ar y Gofrestr Risg Gorfforaethol ddwywaith y flwyddyn a bydd hefyd yn cael ei ddiweddarau ynglŷn â'r broses rheoli risg. Yn ogystal, caiff y Pwyllgor ei frifio ar unrhyw eithriadau/lithriadau yn ogystal ag unrhyw faterion a uwch gyfeiriwyd.

Penderfynwyd derbyn yr adroddiad a nodi ei gynnwys.

CAM GWEITHREDU'N CODI: Y Rheolydd Risg ac Yswiriant i roi adroddiad gwaith byr i'r Pwyllgor yn ei gyfarfod nesaf.

11. CAU ALLAN Y WASG A'R CYHOEDD

Dan Adran 100 (A)(4) Deddf Llywodraeth Leol 1972, gyrrwyd y wasg a'r cyhoedd allan o'r cyfarfod yn ystod y drafodaeth ar yr eitem a ganlyn, oherwydd y tebygrwydd y câi gwybodaeth ei rhyddhau a honno'n wybodaeth y gwna Atodlen 12A y Ddeddf eithriad ohoni fel y diffinnir y wybodaeth yn y Ddeddf ac yn y Prawf Budd y Cyhoedd sydd ynghlwm.

12. DARPARU'R GWASANAETH ARCHWILIO MEWNOL

Cyflwynwyd i sylw'r Pwyllgor Adroddiad y Pennaeth Adnoddau a'r Swyddog Adran 151 Dros Dro yn amlinellu trefniadau ar gyfer darparu'r Gwasanaeth Archwilio Mewnol. Roedd yr adroddiad yn amlinellu'r trefniadau lle byddai Cyngor Bwrdeistref Sirol Conwy a'r Cyngor hwn yn darparu'r gwasanaeth ar y cyd, gyda Chonwy hefyd yn gyfrifol am drosolwg rheoli Gwasanaeth Archwilio Mewnol y Cyngor hwn. Roedd yr adroddiad hefyd yn cynnwys manylion am y cytundeb partneriaeth gyda Chonwy.

Cadarnhaodd y Pennaeth Adnoddau a'r Swyddog Adran 151 Dros Dro ei fod wedi arwyddo'r contract yn unol â'i bwerau dan y cynllun dirprwyo ac y byddai'n dod i rym ar 1 Awst 2015.

Penderfynwyd derbyn yr adroddiad a nodi'r wybodaeth ynddo.

DIM CAM GWEITHREDU PELLACH YN NODI

**Y Cyngorydd R. Llewelyn Jones
Cadeirydd**